

Jangan tertipu lagi-Najib

Utusan Online

18 April, 2013

SHAH ALAM 17 April - Datuk Seri Najib Tun Razak meminta rakyat Selangor memberi sokongan padu kepada pasukan transformasi calon Barisan Nasional (BN) yang diyakininya mampu membawa negeri itu lebih maju dan hebat pada tahun-tahun mendatang.

Sambil menyifatkan rakyat Selangor kini semakin cerdik dan tidak akan tertipu dengan janji- janji pembangkang untuk kali kedua, Pengerusi BN itu berkata, beliau percaya rekod cemerlang BN di peringkat Pusat dapat diterjemahkan dalam membangunkan Selangor jika mandat dikembalikan kepada parti itu 5 Mei ini.

Malah, kata beliau, keyakinan meraih kembali sokongan rakyat itu diperkuatkan lagi dengan kegagalan pakatan pembangkang melaksanakan manifesto mereka sepanjang lima tahun memerintah Selangor.

"Saya dengan rasa rendah diri bagi pihak BN ingin menyatakan kepada rakyat Selangor, kalau percaya kepada kerajaan Pusat, percaya kepada saya ketua kerajaan BN, maka berilah sokongan kepada pasukan BN Selangor.

"Ini kerana pasukan ini menjadi harapan saya untuk membawa transformasi kepada Selangor.

"Kepada pasukan ini, inilah mesej kita. Marilah kita dalam tempoh beberapa hari ini pastikan kita berjumpa dengan semua rakyat. Gunakan masa ini dengan sebaik-baiknya membawa diri dengan pembawaan rasa rendah diri berjumpa rakyat," kata beliau.

Beliau berkata demikian ketika menyampaikan amanat pada pelancaran Aku Janji atau Manifesto BN Selangor yang merangkumi tujuh teras 56 janji di Pusat Konvensyen Shah Alam di sini malam ini.

Yang turut hadir, Timbalan Pengerusi BN negeri, Datuk Seri Noh Omar, Timbalan Pengarah Pilihan Raya BN Selangor, Datuk Seri Ir. Mohd. Zin Mohamed, isteri Najib, Datin Seri Rosmah Mansor serta kesemua calon BN Selangor serta para pemimpin parti komponen.

Najib menarik perhatian bahawa harapan BN untuk mencapai kemenangan di Selangor bukan semata-mata untuk manfaat negeri itu tetapi sebenarnya untuk faedah negara keseluruhannya.

"Kira-kira 60 peratus Keluaran Dalam Negara Kasar (KDNK) di negara ini bergantung kepada kejayaan membangunkan Selangor. Sebabnya peratusan KDNK besar, kalau kita tidak jamin KDNK yang tinggi, tak mungkin negara boleh bertukar jadi negara maju.

"Banyak perkara penting perlu kita tentukan dalam pilihan raya umum ini sebab itu bukan soal Selangor sahaja tetapi untuk Malaysia," katanya.

Menurut beliau, BN telah mempelajari kesilapan lalu dan beliau sendiri telah meminta maaf.

"Dan kita semua berazam untuk melakukan yang terbaik dengan semangat kekitaan kita, semangat barisan 1Malaysia BN yang berkongsi kuasa antara paksi falsafah 1Malaysia," katanya.

Hakcipta Terpelihara © UTUSAN MELAYU (M) BERHAD

Source : : http://www.utusan.com.my/utusan/Pilihan_Raya/20130418/px_10/Jangan--tertipu-lagi---Najib#ixzz2ZuZQ4nKT

© Utusan Melayu (M) Bhd